

Här Fernand Etgen  
President vun der  
Deputéiertechamber  
19, um Krautmaat  
L-1728 Lëtzebuerg

Lëtzebuerg, den 8. Januar 2019

Här President,

Sou wéi d'Chambersreglement et virgesäit, bieden ech Iech, dës parlamentaresch Fro un den Här Transportminister an un dn'Madamm Ëmweltminister weiderzeleeden.

De Noutstand huet de Verkéier op eise Stroossen ganz staark reduzéiert. Vu villen onerwaart, sinn awer d'Emissiounswäerter vun dëser Situatioun net däitlech betraff. Manner onerwaart, well vill Experte schonn ëmmer drop higewisen hunn, datt vill fei Stëbspartikelen an der Natur virkommen, ass och den Undeel u Feinstëbs net signifikant zeréckgaangen. Mee sécher ass, datt de Réckgang vun den Emissiounen net am Verhältnes zum Réckgang beim Autosverkéier ass.

D'Regierungsstrategie fir d'individuell Mobilitéit ze penaliséieren, den Diesel-Motor als onerwënscht ze deklaréieren an E-Mobilitéit ze favoriséieren, baut awer op d'Argument, datt den Individualverkéier Haaptverursaacher vun den héije Stéckstoff- a Fäinstëbs-Wäerter ass. Duerfir hätt ech dës Froen uun d'Regierung:

1. Kann d'Regierung d'Zuele vum Réckgang vun den Emissiounen bei CO<sub>2</sub>, Stéckstoff a Feinstëbs esouwéi d'Zuele vum Réckgang vum Autosverkéier während dem Confinement publizéieren?
2. Iwwerleet d'Regierung, hir Mobilitéitsstrategie ze revidéieren, wann déi nei Miessunge vu Schuedstoffer weisen, datt den Individualverkéier net deen erwaarten Afloss op d'Emissiounen huet an also net esou ëmweltschiedlech ass, wéi bis elo ugeholl?
3. Wéi wëllt d'Regierung sécherstellen, datt an Zukunft Decisiounen, déi Bierger grouse finanzielle Schued kënnen bréngen, objektiv an op enger méi gesécherter wëssenschaftlecher Basis gefaasst ginn?
4. Déi deels gravéierend Nodeeler vun der Elektromobilitéit sinn an de leschte Méint jo vill diskutéiert ginn. Ass deen duerch déi aktuell Miessungen erbruechte Beweis, datt weder bei de Stéckstoff- nach bei de Stëbsemissiounen, den Auto als haaptverantwortlech kann ugesi ginn, Grond genuch, fir hir Aféierung méi lues a reflektéiert ze maachen, fir den Ingenieuren Zäit ze ginn, esou wuel bei der Stromversuergung wéi och bei der Batterietechnologie a virun allem de Materialien, ëmweltfrëndlech Léisungen ze fannen, déi och net op Kanneraarbecht zeréckgräifen?

5. Gesäit d'Regierung och vir, Besëtzer vun Diesel-Autoen, déi duerch falsch Behauptungen a Regierungsmoosnamen e grouse Wäertverloscht op hire Gefierer erfueren hunn, ze entschiedegen?

Mat déiwem Respekt,



Fernand Kartheiser  
Deputéierten